



ANG

Bayan

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Espesyal na Isyu  
Edisyong Hiligaynon  
Agosto 15, 2003  
[www.philippinerevolution.org](http://www.philippinerevolution.org)

# Dakpon ang sitwasyon nga gintuga sang pag-alsa sang mga bataon nga upisyal militar

**Komite nga Tagapagpatuman sang Komite Sentral  
Partido Komunista sang Pilipinas**

**M**adasig nga natumba ang pag-alsa sang mga bataon nga upisyal sang Armed Forces of the Philippines (AFP). Pero sa pihak sini, ang AFP, PNP kag mga reaksyunaryo nga nagaharing sahi padayon nga ginatay-og sang mga pagbulgar kag pagkondenar sang mga nag-alsa sa lapnagon nga korapsyon sa reaksyunaryo nga gubyerno kag AFP-PNP, malala nga demoralisasyon sa kubay sang mga upisyal kag suldado, kag ang pagpadihut sang Malakanyang kag AFP sang terorismo kag pagpangbomba sa Mindanao. Ang mga pagbulgar kag pagkondenar mabaskog nga nagdulot sa ordinaryo nga suldado kag manubo nga upisyal sang AFP-PNP kag mangin sa ordinaryo nga pumuluyo.

Tampok sa mga isyu nga ginapainit sang pag-alsa ang isyu sa korapsyon kag terorista nga pagpangbomba sang AFP sa Mindanao. Pero nakutkut man ang malala nga kaimulon sang pumuluyo, ang kagarukan sang gubyerno kag sosyedad, ang matuod nga ugat sang armado nga inaway, kag ang kakinahanglan sang pundamental nga pagbag-o sa sosyedad.

Ginabasol sang mga propagandista kag abugado sang Malakanyang ang kuneksyon sang reaksyunaryo nga oposisyon sa pag-alsa militar para mabuhinan ang protesta sang mga bataon nga upisyal, limitahan ang kahalitan nga matuga sang pag-alsa, kag presyuron ang mga karibal sa pulitika. Bisan may mga talandaan sang amo nga angtanay, may mga maathag man nga indikasyon sang kaugalingon nga isyu kag kaugalingon nga bunal ang mga bataon nga upisyal. Ang pagkadalahig naman sang reaksyunaryo nga anti-GMA sa mga ekstra-konstitusyunal nga tikang-maluwas sa nagasalaming sang desperasyon sang pila

sa ila-dugang nga nagapasingki sa mga banggianay kag inaway sang mga reaksyunaryo.

Gani ang pag-alsa kag ang nagasunod nga mga pagpakamalaut kag mga maniobra kag kontra-maniobra labi nga nagpainit sa mga pangunahon nga isyu pungsodnon kag pangkatilingban kag labing nagpadalom sa mga banggianay sang mga reaksyunaryo. Dakpon naton ang maayo nga sitwasyon para sa pagpalapad kag pagpabaskog sang ahitasyon kag propaganda, mga protesta pangmasa, mga taktikal nga opensiba, kag mga hilikuton alyansa.

Ang labi pa nga pagpapagsik sang mga pangmasang paghimakas kag mga TO ang pinakamaayo nga paghanda para sa iban pa nga dalagku nga away: pagbisita ni Bush, pagpamatuk sa interbensyon militar sang US, pagbatu sa ginapasingki nga pasista nga pagpanalakay sa mga prenteng gerilya kag kahublagang masa, 2004 eleksyon, kag iban pa.

Samtang nagalikaw nga maipit sa halambalanon sang pagsuporta ukon indi gani pagkondenar sa pag-alsa-hatagan tum-ok naton ang pagkutkut sa mga kaso kag isyu sang korapsyon kag kagarukan, terorista nga pagpangbomba sang AFP sa Mindanao, kag iban pa nga kontra sa masa, antinasyunal kag antidemokratiko nga padihut sang papet nga rehimen agud dugang pa nga palaparon ang angot kag pagbuligay sa pinakamalapad nga posibleng kubay sang mga progresibo kag positibo nga pwersa.

Dugangan pa ang paghamulag kag pagbunal sa imperyalismong US, sa nagahari nga hubon sang papet nga Macapagal-Arroyo kag sa mataas nga kumand sang AFP kag PNP. Ang terorista nga

pagpang-intriga sang AFP sa Mindanao direkta nga nagaserbi sa pagpasingki sang interbensyon militar sang US kag todo nga militarisasyon kag pasista nga terorismo sang papet kag reaksyunaryo nga estado.

Mangin alerto man sa pagtuhaw sang dugang kag mas daku nga litik sa kampo sang nagahari nga reaksyunaryong paksyon para labi nga ihamulag ang pinakadaku kag pinakamaasab nga mga papet kag reaksyunaryo nga nagapalibot sa hubon Arroyo-Reyes.

Husto nga mentenaron sang ligal nga demokratiko nga hublag ang distansya sa mga reaksyunaryo nga oposiyon nga maka-Estrada kag pinakamalaut nga mga salin pangpulitika sang pasista nga hubon Marcos. Husto nga magmartsa sang separado ang ligal nga demokratiko nga hublag bisan magkadungan ang mga maka-Estrada kag maka-Marcos sa paghulag angot sa isa ka isyu ukon okasyon.

Kadungan man, dapat aktibo naton nga himuslan ang masingki nga inaway nila sa nagahari nga paksyong Macapagal-Arroyo. Kinahanglan mangin agresibo kag matinugahon sa pagpangita sang mga pamaagi para makapanginpulos sang di direkta kag sa indi hayag nga paagi ang kahublagang masa kag rebolusyonaryong hublag.

May partikular nga importansya ang papel sang kahublagang masa kag hilikuton alyansa sa Mindanao. Kinahanglan pabaskugon ang kahublagan para imbestigahan ang mga pagpangbomba kag pasista nga terorismo sa Mindanao, silutan ang mga utok sang mga ini, kag bayaran danyos kag buligan ang mga biktima. Dapat sentruhan man sang ini nga kahublagan ang paghayag kag pagbatu sa ginapasingki nga interbensyon militar sang US kag militarismo kag pasismo sa isla sa bilog nga pungsod. Kinahanglan aktibo nga magbulig sa pagpabaskog sang kahublagang protesta sa Mindanao ang ligal nga demokratiko nga kahublagan sa iban nga bahin sang pungsod labi na ang sa Metro Manila.

May partikular nga importansya man ang pagsabat sang kahublagan pamatan-on sa mga isyu kag pag-alsa sang mga bataon nga upisyal sang AFP. Kinahanglan manguna ang progresibo nga kahublagan pamatan-on sa pagkutkut, pagtalakay, kag pagpahulag sang malapad nga kubay sang pamatan-on kag pumuluyo para lubaron ang mga isyu sa korapsyon, kaimulon, kagarukan sa katilingban kag gubyerno, kag pundamental nga pagbag-o sa

katilingban.

Kinahanglan pabaskugon ang anti-imperyalista nga kahublagan protesta bilang bahin sang padayon nga pagbatu sa interbensyon militar sang US, paghimakas sa imperyalista nga globalisasyon, kag paghanda sa pagbisita ni Bush sa Oktubre. Sunod-sunod nga mga dalagku nga isyu ang pwede palutawon tubtub sa pag-abot ni Bush: interbensyon militar, *open skies agreement*, lubos nga liberalisasyon sang World Trade Organization (WTO) sa agrikultural nga negosyo, kasugtanan sa *immunity* sang mga tropa sang US sa International Criminal Court, *charter change* agud labi nga paboran ang mga korporasyon nga transnasyunal kag iban pa.

Kinahanglan palaparon kag papagsikon ang pakigbuligay kag pagpahulag sa mga pwersa kag makabanwa nga elemento. Papagsikon ang mga aksyong protesta, hilikuton propaganda, mga *forum* kag nagkalain-lain nga pagtilipon kag aktibidad nga anti-imperyalista kag sug-alawon si Bush sang mga dalagku nga protesta.

May signipikante nga papel ang pagpapagsik sang mga TO sang BHB sa pagsingki sang krisis sa pulitika sang reaksyunaryo nga nagaharing sistema. Kinahanglan dugang pa nga palaparon kag pasingkion ang mga TO para lubos nga batuan ang pagkurukuso sang papet nga hubon Arroyo-Reyes nga sayluhon ang mas daku pa nga pwersa kag armas pakadto sa mga prenteng gerilya sang BHB, pabayaron sila sang mahal sa ginapasingki nga pasista nga terorismo sa kaumhan kag kasyudaran, kag batuan ang ginapasingki nga interbensyon militar sang US.

Pinakaimportante sa tanan ang labi pa nga pagpabaskog sang ahitasyon kag mga pangmasang paghimakas sa mga baryo, pabrika, komunidad, eskwelahan kag kalye. Ang aktibo nga malaparan nga ahitasyon kag propaganda dapat dunganang sang labing mas malapad nga pagsuyod, pag-abot kag pagpahulag sang masa sa mga basehan nga lebel. Kinahanglan pursigido nga lubaron kag pangibabawan ang mga sablag kag problema sa pagpalapad kag pagpataas sang lebel sang organisasyong masa. Kinahanglan pursigido nga buhion kag papagsikon ang mga kampanya kag protestang masa. Kinahanglan pinuhon kag pauswagon ang mga pamaagi kag teknik sa pagpukaw kag pagpahulag sa masa.

AB